

RIOM: Origen e covid-19

# Scu segn dalla speranza

Gion Nutegn Stgier/FMR

Igl casti Rätia Ampla è a Riom la noda digl li. La seira sa preschainta igl bietg istoric actualmaintg an calour cotschna. Chegl scu segn da solidaritad per la cultura tg'è da preschaint ple u manc inactiva perveia dallas maseiras digl coronavirus. An en screiver è Giovanni Netzer, igl intendant digl Origen Festival Cultural, sa drizzo agls vers 1500 commembers dall'organisaziun da promozziun Pro Origen ed agls radond 5000 ameis tgi igl pi grond festival cultural digl Grischun ò aint igl frataimp. Da renunztgier agl program d'anviern fetscha bagn mal, screiva Giovanni Netzer.

I seia sto previa da darveir la tor cotschna sensom igl Pass digl Gelgia cun en'exposiziun speziala da Babylon. Seradas restan pigl mument er las dus villas, la villa «Alva» agls Mulegns e la villa «Carisch» a Riom. Ainten la villa «Alva» è stada preveida l'installaziun da gleichs da Serge Schmucki e da vaseir fissan er stadas sculpturas da setger da Martin Leuthold. Ultra da chegl vess la «ETH» Turitg anvido aint igl schler dalla villa ad en'exposiziun cugl tema construcziun digitala. Re-



Igl casti da Riom an calour cotschna scu segn da speranza per l'antiera cultura. (MAD)

nunztgia vign pigl mument er all'installaziun da film ainten la «Clavadeira» a Riom, la tgesa da teater. Per la reschia digl film sur digl Origen Festival Cultural è sto responsabel igl reschissour roman Maxim Derevianko.

Scu segn dalla speranza per miglers taimps per la cultura lascha Giovanni Netzer re-

splender igl casti da Riom an calour cotschna. L'antiera cultura pitescha da preschaint cun esser sfurzada da far ena pôssa perveia dallas ordinaziuns da covid-19, punctuescha Giovanni Netzer. La calour cotschna duess esser en segn da solidaritad e da speranza per en avigneir cultural positiv.

*Igl verset digl de*

*«In onn e laung,  
e blears passan speart.»*

Proverbi surmiran, Crestomazia tom 10